

Desiree Helder a bira director nobo di Directie Ouderenzaken

RECIENTEMENTE a anuncia nombramento di dr. Desiree Helder como director di Directie Ouderenzaken. Cu un carera remarcabel, cubriendo mas di 20 aña como Hefe di Departamento na Central Bureau Statistieken (CBS), Desiree Helder ta trece un nivel incomparable di experiencia y conocimiento cu ta alinea perfectamente cu e mision di Directie Ouderenzaken.

Despues di a caba su estudio na Nijmegen, Hulanda, unda el a studia Neuro- en Revalidatiepsychologie, el a cuminsa un promotieonderzoek na Universidad di Leiden, enfocando riba e malesa neurodegenerativo Huntington. E investigacion aki a concentra riba con e pashentenan y nan famia ta biba cu e malesa y con nan ta maneha e desafionan emocional y mental. Na 2002, Desiree Helder a logra su doctorado (Ph.D.) na Universidad di Leiden mientras e cu e tabata Universitair Docent den e Facultad di Medicina.

Na 2004, Desiree Helder a bolbe na su tera natal Aruba, unda el a tuma un puesto na CBS como estadisticus di salud. Eventualmente Desiree Helder a bira hefe di Departamento di Proyecto y Investigacion. Na 2018, el a asumi e rol di Waarnemend Directeur di CBS.

Durante su carera na CBS, Desiree Helder a investiga y publica raport riba tema importante cu ta impacta nos adultonan mayor, entre otro e prevalencia di incapacidad, riesgo di malesa cronico, y salud mental.

Despues di un proceso amplio, Desiree Helder a cuminsa oficial dia 15 di september 2024 como director di Directie Ouderenzaken.

Como director di Directie e ta keda encarga di implementacion di maneho di Ministerio di Adulto Mayor y e proyectonan cu ta enfoca riba e bienestar, cuido y participacion di adulto mayor na Aruba, un sector cu ta conta pa 23% di nos poblacion y cu ta creciendo dia pa dia mas.

E mision di Directie Ouderenzaken ta pa centralisa un sistema di cuido integral, cu servicio tanto pa cuido formal como informal, y pa asegura cu nos adultonan mayor ta haya e atencion y respet cu nan merece.

Desiree Helder su liderato y amplio conocimiento den e campo di investigacion y estadistica lo yuda pa desaroya y implementa un sistema di cuido responsabel y informa pa e grupo vulnerable aki. Su experiencia lo sin duda trece innova-

cion y un enfoque fresco na Directie Ouderenzaken.

Nos ta desea Desiree Helder hopi exito den su funcion nobo, caminda cu lo fortifica e calidad di cuido pa adultonan mayor na nos pais.



MENSAHE DI DIA

19
september
2024

E BERDAD

ta manera un operacion.
E ta haci dolor pa un momento, pero e ta sana.

E MENTIRA

ta manera un pilder calmante pa dolor.
E ta duna alivio mes ora,
pero e tin efecto secundario pa semper.

*e Poder
den Mi*



Den colaboracion cu *Aruba Incense*